

Eia hoi ke ano o ka mahiai ana ma ka aina wai i kela wa kahiko o na kanaka Hawaii: Hele ke kanaka mahiai a kona loi, kolepe mua oia i ka nabelehele a pau, waiho aku a pulu, alaila kupele hou, a ike oia i ke ano kupono ke kanu, alaila kii ka pu-a huli, lawe a ka loi, puepue mua, a mahope kanu aku; aole e hookomo nui i ka wai, o hoolana ia ka huli, a pau na pule elua a oi aku paha, alaila noho aku a tiuliu; a ulu ae la ka nabelehele, alaila mahiai hou, he "au-loi" ka inoa o ia mahiai ana; a i ka ulu ana mai o ka ai a lau kolu, he lau pai ia, a he lau awa hoi ke ako ia i luau; a oia lau awa, ako mai la ke kanaka mahiai a nui, ope a paa, ho-a ke ahi, pulehu hoi a moa, alaila wehe ae i ka wa-hi o waho a pau, alaila, wehe ae la i ke poi o ka umeke poi, a pule aku la i ke akua, penei:

"E Kaneikawaieola, eia ka luau, ka lau mua o ka ai a kua, e Kane, e hoi, e ai, e ola ia'u i ko pulapula, i mahiai, i kukulu hale, i lawaia no hoi, ho mai he ola, i ola nui, a kolopupu, a kanikoo, a palalauhala, a haumaka-iole, moe i ka moena, a huli ke alo iluna, a ka i ko-ko, o kau ola ia e kuu akua, Amaama, ua noa, tele wale hoi." Pau ka pule, alaila, o ka ai iho la no ia a maona. Noho a hiki i ka wa oo o ke kalo, alaila, hele ua kanaka mahiai nei a hiki i na loi kalo ana, alaila ku iho

"Eia Hoi ke Ano o ka Mahiai ana."

Ka Nupepa Kuokoa.

March 11, 1893.

la ma kuauna, a kahea aku la i ke akua hooulu ai, penei:

“E Kukeolowalu, he olowalu ke kalo, he pumaia ka ha o ke kalo, laumaia ka lau o ke kalo a kua la. E Kukeolowalu, nalowale ke kana-ka iloko o ka kua kalo la. E Kukeolowalu, kuu akua, ua oo ke kalo a kua; e Kukeolowalu, lawe au i ke kalo me na oha, me na kamau, koe aku ka puu i ola, i huli no ka amau a kua la; e Kukeolowalu, huihui ka ai a kua la, auamo ka ai a kua la, e kalua ka ai, a moa, a ku'i, a wali ka ai a kua. E Kukeolowalu, ka-ka ka wahie, ho-a ka imu, uumi ka puua, kalua ka imu o ka puua, kau i ka imu, unuunu ka hulu, ku-ai ka puua, hoolua ka imu o ka puua a kua, ea, e Kukeolowalu, a moa ka puua, okioki a piha ke pa laau, e ai ke kane, e ai ka wahine, e ai ke keiki i ka puua, i ke kalo a kua la, ea, e Kukeolowalu, a papa iki, a papa nui, elieli kapu, elieli noa, noa i waena honua, ua noa. Amama, lele wale.” O keia iho la ke ano o ka mahi kalo ana a kekahi poe ma na aina wai i ke au o Waawaaikinau-po ma.

(Aole i pau.)

“Eia Hoi ke Ano o ka Mahiai ana.”

Ka Nupepa Kuokoa.

March 11, 1893.